

BOSNA I HERCEGOVINA
BRČKO DISTRIKT
BOSNE I HERCEGOVINE
PRAVOSUDNA KOMISIJA
BRČKO DISTRIKTA
BOSNE I HERCEGOVINE

NACRT

ZAKON
O IZMJENAMA I DOPUNAMA ZAKONA O NOTARIMA BRČKO
DISTRIKTA BIH

Brčko, _____ 2023. godine

Na osnovu člana 22 Statuta Brčko distrikta Bosne i Hercegovine - prečišćeni tekst („Službeni glasnik Brčko distrikta Bosne i Hercegovine“, broj 2/10) Skupština Brčko distrikta Bosne i Hercegovine, na ____ redovnoj sjednici održanoj _____ godine, usvaja

ZAKON O IZMJENAMA I DOPUNAMA ZAKONA O NOTARIMA BRČKO DISTRIKTA

Član 1

U Zakonu o notarima Brčko distrikta („Službeni glasnik Brčko distrikta Bosne i Hercegovine“, broj:9/03 i 17/06), mijenja se naziv zakona i glasi: „Zakon o notarima Brčko distrikta Bosne i Hercegovine.“

Član 2

U članu 4 stav (3) mijenja se i glasi:

„(3) Notarske isprave imaju snagu javne isprave i važe na teritoriji Brčko distrikta Bosne i Hercegovine i Bosne i Hercegovine, kod svih organa vlasti, pravnih osoba i drugih institucija.“

Vrši se ispravka u numeraciji posljednjeg stava (6) tako da isti postaje stav (7).

Član 3

U članu 5 stavu (1) tačke 4. i 6. mijenjaju se i glase:

„ 4. da je položilo pravosudni ispit u Bosni i Hercegovini, ili prije 06.04.1992. godine, u bivšoj Jugoslaviji. Ukoliko je pravosudni ispit položen u nekoj drugoj državi, ovaj uslov se smatra ispunjenim nakon priznavanja tog ispita od strane nadležnog organa.

„6. da nije osuđivano za krivična djela protiv čovječnosti i međunarodnog prava, službene ili druge dužnosti, ili za drugo krivično djelo koje ga čini nedostojnim za vršenje službe notara, koje u vrijeme imenovanja još nije brisano iz kaznene evidencije koju vodi nadležni organ.“

Član 4

U članu 7 stav (5) mijenja se i glasi:

„(5) Konkurs se obavezno objavljuje u „Službenom glasniku Brčko distrikta BiH“, „Službenom glasniku Republike Srpske, „Službenim novinama Federacije BiH“, internet stranici Pravosudne komisije i po potrebi u najmanje jednim dnevnim novinama u Federaciji BiH i Republici Srpskoj.“

Član 5

Član 8 mijenja se i glasi:

„Član 8 Izbor notara

(1) Za notara se mogu izabrati samo takvi kandidati koji su po svojim radnim i ljudskim kvalitetima dostojni ugleda notarske službe.

(2) Kod izbora između više kandidata koji ispunjavaju uslove iz člana 5 ovog zakona, odlučujući kriterij je uspjeh postignut na notarskom ispitu. Kao drugi kriterij, Pravosudna komisija može propisima obavezati sve kandidate da polažu test o pravnim specifičnostima Distrikta. Identitet kandidata neće biti vidljiv iz testa. Za takav test neće se davati ocjena, kandidati će «položiti» test ili «pasti» na testu.

(3) Ukoliko dva kandidata imaju isti uspjeh, prilikom izbora notara uzet će se u obzir pravni poslovi koje je kandidat obavljao.

(4) Izbor kandidata prijavljenih na konkurs mora se izvršiti najkasnije u roku od 30 dana od dana isteka roka za podnošenje prijave na konkurs.

(5) Pravosudna komisija formira komisiju za sprovođenje konkursa, koja utvrđuje listu kandidata koji ispunjavaju uslove predviđene konkursom.

(6) Rješenje o izboru kandidata donosi predsjednik Pravosudne komisije.

(7) Kandidati koji ne budu izabrani za notara dobijaju pismeno obavještenje koje sadrži razloge zbog kojih oni nisu izabrani, kao i podatke o kandidatu koji je izabran za notara.

(8) Protiv rješenja o izboru notara može se u roku od osam dana nakon prijema rješenja, odnosno obavještenja uložiti prigovor Pravosudnoj komisiji. Prigovor protiv rješenja o izboru kandidata za notara zadržava izvršenje rješenja.

(9) Pravosudna komisija dužna je odlučiti o prigovoru u roku od 30 dana od dana prijema prigovora. Rješenje kojim je odlučeno o prigovoru je konačno.

(10) Protiv rješenja iz stava (9) ovog člana može se pokrenuti upravni spor pred nadležnim sudom.“

Član 6

Član 10 mijenja se i glasi:

„Član 10 Prestanak službe notara

(1) Služba notara prestaje:

1. smrću,
2. navršenjem 70 godina života,
3. pismenim otkazom notara,
4. ako bude osuđen za krivično djelo iz člana 5 tačke 6. ovog zakona ili ako mu bude izrečena zabrana daljeg obavljanja službe notara,
5. ako bez valjanog razloga ne započne s radom u roku utvrđenom u stavu 5 člana 9 ovog zakona,
6. kad na osnovu odluke disciplinskog organa izgubi pravo na obavljanje službe notara,
7. razrješenjem.

(2) Do prestanka službe u slučajevima iz stava (1) ovog člana dolazi:

1. u slučaju iz tačke 1. - danom smrti,
2. u slučaju iz tačke 2. - navršenjem godina života,
3. u slučaju iz tačke 3. - danom donošenja konačnog rješenja o prestanku službe,
4. u slučaju iz tačke 4. - pravosnažnošću krivične presude,
5. u slučaju iz tačke 5. - danom kojim je trebao započeti sa radom,
6. u slučaju iz tačke 6. - pravosnažnošću odluke disciplinskog organa,
7. u slučaju iz tačke 7. - pravosnažnošću odluke o razrješenju.

(3) U slučajevima iz stava (2) tačke 1. do 5. ovoga člana predsjednik Pravosudne komisije će donijeti rješenje kojim će utvrditi prestanak službe.

(4) Rješenje iz stava (3) ovog člana je konačno u upravnom postupku i protiv njega se može pokrenuti upravni spor kod nadležnog suda.

(5) Notar kojem je služba prestala iz razloga iz stava (1) ovog člana dužan je prestati sa radom momentom nastupanja razloga prestanka službe iz stava (2) tačke 2.- 7.

(6) O prestanku službe notara Pravosudna komisija će obavijestiti nadležnu notarsku komoru radi ispisa notara iz Imenika notara, kao i sud kod kojeg je notar deponovao svoj potpis.

Član 7

U članu 13 stavu (1) iza tačke 2. dodaje se nova tačka 3. koja glasi:

„3. ako je potvrđena optužnica za krivično djelo učinjeno u vršenju službe notara.“

Iza dosadašnjeg stava (3) dodaje se novi stav (4) koji glasi:

„(4) Rješenje iz stava (3) ovog člana je konačno i protiv njega nije dozvoljen prigovor ali se može pokrenuti upravni spor kod nadležnog suda.“

Član 8

U članu 15 stav (1) mijenja se glasi:

„(1) Ako je služba notara prestala, Pravosudna komisija može bez javnog konkursa odrediti vršioca dužnosti notara. Za vršioca dužnosti notara može biti postavljen samo drugi notar ili notarski pomoćnik, a u slučaju nemogućnosti imenovanja notara ili notarskog pomoćnika za vršioca dužnosti notara može se imenovati lice koje ispunjava uslove iz člana 5 ovog zakona.“

Član 9

Član 16 mijenja se i glasi:

„Član 16
Notarski pomoćnik

(1) U notarskoj kancelariji može biti zaposlen notarski pomoćnik.

(2) Notarski pomoćnik je lice zaposleno u notarskoj kancelariji na neodređeno vrijeme koje je upisano u imenik notarskih pomoćnika koju vodi nadležna notarska komora.

(3) U notarskoj kancelariji mogu biti zaposlena najviše tri notarska pomoćnika.

Član 10

Član 17 mijenja se i glasi:

„Član 17
Uslovi za službu

(1) Za notarskog pomoćnika mogu biti primljena samo lica koja su svojim radnim i ljudskim kvalitetima dostojna ugleda djelatnosti notara.

(2) Za notarskog pomoćnika može biti izabrano lice koje ispunjava uslove iz člana 5. stav (1) tačke 1.,2.,3.,4.,5.,6. i 7. ovog zakona.

(3) Notarski pomoćnik nakon izbora polaže zakletvu u skladu sa odredbom člana 9. stav (3) ovog zakona.“

Član 11

Član 18 se briše.

Član 12

Član 19 mijenja se i glasi:

„Član 19

Javni konkurs za izbor notarskog pomoćnika

(1) Izbor notarskog pomoćnika vrši se javnim konkursom.

(2) Konkurs organizuje i sprovodi Pravosudna komisija uz pribavljeno mišljenje nadležne Notarske komore, a po prethodno dostavljenom zahtjevu notara kod kojeg se izbor vrši.

(3) Konkurs mora sadržavati slijedeće podatke: opšte i posebne uslove za imenovanje notarskog pomoćnika, rok podnošenja prijave i rok za obavještanje kandidata o rezultatima konkursa.

(4) Konkurs se obavezno objavljuje u „Službenom glasniku Brčko distrikta BiH“, „Službenom glasniku Republike Srpske, „Službenim novinama Federacije BiH“, internet stranici Pravosudne komisije i po potrebi u najmanje jednim dnevnim novinama u Federaciji BiH i Republici Srpskoj.“

(5) Rok za podnošenje prijave na konkurs je 30 dana od posljednjeg objavljivanja konkursa u skladu sa stavom (4) ovog člana.

Član 13

Član 20 mijenja se i glasi:

„Član 20

Postupak izbora notarskog pomoćnika

(1) Pravosudna komisija dužna je da u roku od 15 dana nakon isteka roka za podnošenje prijave na konkurs, dostavi notaru kod kojeg se vrši izbor notarskog pomoćnika listu kandidata koji ispunjavaju uslove navedene u konkursu.

(2) Notar kod kojeg se vrši izbor notarskog pomoćnika je dužan u roku od 30 dana od dana prijema liste iz stava (1) ovog člana, obaviti ulazni intervju sa kandidatima sa liste i donijeti rješenje o izboru.

(3) Obavještenje sa rješenjem o izboru notarskog pomoćnika, notar kod kojeg se vrši izbor dostavlja Pravosudnoj komisiji, koja pismeno obavještava kandidate koji su pristupili na ulazni intervju o rezultatima izbora.

(4) Protiv rješenja iz stava (3) ovog člana može se pokrenuti upravni spor pred nadležnim sudom.“

Član 14

Član 21 se briše.

Član 15

Član 22 mijenja se i glasi:

„Član 22 Poslovi notarskog pomoćnika

(1) Notarski pomoćnik obavlja sve poslove u ime i za račun notara kod kojeg radi koje je po zakonu ovlašten da obavlja notar.

(2) Notarski pomoćnik potpisuje notarske isprave sa napomenom da potpisuje u svoje ime a za notara kod koga radi.

(3) Poslovi koje u okviru svoga djelokruga obavlja notarski pomoćnik imaju isto pravno dejstvo kao da ih je neposredno obavio notar.

(4) Notarski pomoćnik dužan je da se za vrijeme službe pridržava istih prava i obaveza i pravila koja važe za notara.

(5) Prije početka rada notarskog pomoćnika, notar kod kojeg pomoćnik notara obavlja poslove je obavezan predsjedniku suda dostaviti službeni potpis koji će notarski pomoćnik upotrebljavati prilikom preduzimanja službenih radnji, a notarski pomoćnik uz potpis mora navesti i svoje službeno svojstvo.“

Član 16

Član 23 mijenja se i glasi:

„Član 23 Plata notarskog pomoćnika

Notarski pomoćnik za vrijeme trajanja službe ostvaruje platu i ostala prava iz radnog odnosa kod notara, u skladu sa zakonima i propisima Distrikta koji se odnose na radne odnose i plate stručnih saradnika u pravosudnim institucijama Brčko distrikta BiH.“

Član 17

U članu 27 iza stava (2) dodaje se stav (3) koji glasi:

„(3) Stručni saradnik može umjesto notara kod kojeg radi vršiti ovjeru potpisa, rukoznaka i prijepisa.“

Član 18

U članu 89. stav (1) mijenja se i glasi:

„(1) Notar vodi slijedeće poslovne knjige:

1. opšti poslovni upisnik, u koji se upisuju svi notarski izvornici,
2. opšti poslovni upisnik ovjere prepisa i potpisa,
3. imenik lica koja su pred notarom predala kakvo raspolaganje za slučaj smrti, s oznakom broja odnosnog spisa,
4. depozitnu knjigu o preuzetom i izdatom tuđem novcu, vrijednosnim papirima i dragocjenostima, u koju se, pored tačne oznake preuzetog depozita, treba unijeti ime i adresa deponenta te onoga kome se predmet treba predati,
5. upisnik poslova koje je sud ili koji drugi organ vlasti povjerio notar, s abecednim imenikom,
5. zajednički abecedni imenik stranaka za njegove upisnike, te za depozitnu knjigu koji se može voditi elektronski.“

Član 19

Član 91 mijenja se i glasi:

„Član 91

(Čuvanje u slučaju prestanka notarske djelatnosti)

(1) Ako notar prestaje sa vršenjem poslova, prvi radni dan nakon prestanka službe notara, notarski spisi, poslovne knjige i sva druga dokumentacija predaje se u depozit Arhiva Brčko distrikta BiH, a pečate, štambilje, novac i vrijednosne papire preuzima na čuvanje Pravosudna komisija.

(2) Notar je dužan prije primopredaje pripremiti arhivsku građu notara u skladu sa propisima kojima se uređuje arhivska djelatnost.

(3) Dokumentaciju i predmete iz stava (1) ovog člana zapisnički preuzima komisija koju rješenjem imenuje Pravosudna komisija/gradonačelnik, a koju čine predstavnici Pravosudne komisije i Arhiva Brčko distrikta BiH.

(4) Ukoliko je potrebno izvršiti pregled i popis arhivske građe notara koja se predaje, Pravosudna komisija/gradonačelnik rješenjem imenuje posebnu komisiju koju čine predstavnici Pravosudne komisije i Arhiva Brčko distrikta BiH.

(5) Pravosudna komisija određuje mjesto čuvanja pečata, štambilja, novca i vrijednosnih papira, kao i lice koje će biti ovlašteno da postupa po spisima iz arhivske građe notara kojem prestaje služba.

(6) Postupak i način preuzimanja i čuvanja notarskih spisa, poslovnih knjiga i druge dokumentacije iz stava (1) ovog člana vrši se u skladu sa propisima kojima se uređuje arhivska djelatnost.

(7) Ukoliko notar ne omogući postupanje na način definisan u stavovima (1) do (4) ovog člana, komisija iz stava (3) ovog člana izvršit će pečaćenje notarske kancelarije, a preuzimanje pečata i arhivske građe će se izvršiti uz asistenciju nadležnih organa.

(8) Ako se prilikom postupanja po arhivskoj građi notara utvrdi da neki spis nedostaje, predsjednik Pravosudne komisije zatražit će izjašnjenje notara kojem je prestala služba notara.

(9) Ako spis ne bude pronađen, o tome će se obavijestiti stranke da bi mogle preduzeti potrebne mjere radi zaštite svojih prava.

(10) Ako se kod stranaka, državnog organa ili nekog drugog notara nalazi otpravak originala ili ovjereni prepis nestalog originala, notar kojeg imenuje predsjednik Pravosudne komisije, sačinit će ovjereni prepis te isprave koji će se čuvati umjesto nestalog originala.

(11) Odredbe stavova (1) do (10) ovog člana koje se odnose na notarske spise, poslovne knjige i drugu dokumentaciju ne odnose se na vršioca dužnosti notara kojem služba vršioca dužnosti prestaje zbog izbora i imenovanja notara, u kojem slučaju se arhivska građa vršioca dužnosti notara predaje na čuvanje, upotrebu i dalje korištenje notaru kojem počinje služba notara.

(12) U slučaju smrti notara, njegovi zakonski, odnosno testamentarni nasljednici imaju obavezu da izvrše predaju arhive notara.

(13) Predaja arhive u slučaju smrti notara vrši se na način i po postupku utvrđenom ovim članom.

(14) Ukoliko među licima iz stava (12) ovog člana nema saglasnosti ko će od njih predati arhivu notara ili lice koje je dužno da to učini, odbije to učiniti, nadležni sud koji sprovodi ostavinski postupak će, bez odgađanja, odrediti lice koje je dužno da izvrši predaju arhive notara.“

Član 20

U članu 94 stavu (1) iza tačke 14. dodaju se nove tačke 15. i 16. koje glase:

„15. ako neuredno, nesavjesno, protivno odredbama ovog zakona i drugih propisa čuva spise, poslovne knjige i evidencije,

16. ako se ponaša nedostojno prema strankama i organima koji vrše nadzor nad njegovim poslovanjem ili na drugi način ne postupa u skladu sa pravilima ponašanja notara.“

Član 21

Član 96 mijenja se i glasi:

„Član 96 (Disciplinski postupak)

(1) Prijavu za pokretanje disciplinskog postupka može podnijeti svako lice koje ima saznanja o učinjenoj povredi službene dužnosti notara.

(2) Disciplinski postupak za utvrđivanje disciplinske odgovornosti notara pokreće se zahtjevom koji podnosi disciplinski tužilac i koji se obavezno dostavlja notararu protiv koga se postupak pokreće i prvostepenoj disciplinskoj komisiji i protiv njega nije dozvoljena posebna žalba.

(3) Disciplinskog tužioca rješenjem imenuje predsjednik Pravosudne komisije iz reda službenika Pravosudne komisije, koji mora biti diplomirani pravnik sa položenim pravosudnim ispitom i najmanje tri godine radnog iskustva na pravnim poslovima.

(4) O zahtjevu za pokretanje disciplinskog postupka protiv notara i o vođenju disciplinskog postupka odlučuje i disciplinsku mjeru izriče prvostepena disciplinska komisija.

(5) Prvostepenu disciplinsku komisiju imenuje nadležna Notarska komora i ona se sastoji od tri člana iz reda notara.

(6) Protiv rješenja prvostepene disciplinske komisije može se izjaviti žalba drugostepenoj disciplinskoj komisiji u roku od 15 dana od dana prijema rješenja.

(7) Drugostepenu disciplinsku komisiju rješenjem imenuje predsjednik Pravosudne komisije i čine je dva člana ispred Pravosudne komisije i jedan član iz reda notara nadležne notarske komore.

(8) Rješenje drugostepene disciplinske komisije je konačno i protiv njega se može pokrenuti upravni spor pred nadležnim sudom.

(9) Organizacija i rad drugostepene disciplinske komisije uređuje se poslovníkom o radu kojeg donosi Pravosudna komisija“.

Član 22

Ovaj zakon stupa na snagu osmog dana od dana objavljivanja u „Službenom glasniku Brčko distrikta BiH.“

Broj:
Brčko,

PREDSJEDNIK
SKUPŠTINE BRČKO DISTRIKTA BIH
Siniša Milić